

## NYUMBA YA HAKI YA ULIMWENGU

Naw-Rúz 177

Kwa Wabaha'i wa Ulimwengu

Marafiki Wapendwa sana,

Tunahisi kulazimishwa na matukio ya sasa kuwaandikia katika wakati huu na siyo kusubiri hadi Ridván. Kama ambavyo nyote mtakuwa mnatambua vyema kabisa, kwa kipindi cha majuma na miezi ya hivi karibuni, ulimwengu wenye hofu umekuwa ukukabiliana na hali ya hatari ya kiafya inayoongezeka kwa haraka na kuathiri watu katika nchi nyingi, matokeo ambayo kwa jamii bado hayawezi kukadiriwa kwa uhakika wowote ule. Tuna hakika kwamba, ninyi, kama sisi, mmekuwa na wasiwasi mkubwa kwa ajili ya ustawi wa jamii ya binadamu, hususan kwa wale ambao ni wahanga zaidi. Ni nadra imekuwa dhahiri zaidi kwamba nguvu ya pamoja ya jamii hutegemea juu ya umoja inaoweza kuudhihirisha kivitendo, kuanzia kwenye jukwaa la kimataifa hadi mashinani, na tunajua kwamba mnatoa msaada wenu kwa jitihada za lazima zinazofanyika kuhusiana na hili ili kulinda afya na ustawi wa wote.

Pasipo kuepukika, hali ya sasa itakuwa na athari juu ya utawala wa Hoja ya Mungu katika maeneo mengi, na katika kila kisa Baraza la Kiroho la Kitaifa husika litashauri juu ya hatua zifaazo za kuchukuliwa. Katika baadhi ya nchi hii itajumuisha kusitishwa kwa Mikutano Mikuu ya Kitaifa, huku mipangilio ikifanywa kwa Baraza la Kitaifa kuchaguliwa kwa njia nyingine. Mipangilio kama hiyo inaweza pia kuhitaji kufanyika, katika baadhi ya maeneo, kwa ajili ya uchaguzi wa Mabaraza ya Kiroho ya Mahali. Walakini, katika mazingira ambapo hata hili huthibitisha kutowezekana, ingeruhusiwa kwa mwaka huu kwa wajumbe waliopo wa Baraza la Mahali au la Kitaifa kuendelea kwa mwaka mwingine wa kiutawala. Bila shaka, Baraza lolote la Kitaifa linalofikiria kuidhinisha hatua kama hiyo litaomba ushauri wa Washauri tangu katika hatua za mwanzoni.

Katika wakati wa hatari nyingine, ‘Abdu’l-Bahá alitoa maneno haya ya ushauri: “Katika siku kama hii, wakati tufani za majaribu na taabu zimeufunika ulimwengu, na woga na kutetemeka vimeitikisa sayari, ninyi lazima muinuke juu ya kipeo cha uimara na uthabiti kwa nyuso zilizoangaziwa na paji angavu za uso kwa namna ambayo kwamba, Mungu akipenda, majonzi ya woga na fadhaa yaweze kufutiliwa mbali kabisa, na mwangaza wa imani uweze kupambazuka juu ya kipeo dhahiri na kung’aa kwa wangavu.” Ulimwengu upo katika uhitaji zaidi na zaidi wa tumaini na nguvu ya roho ambayo imani huleta. Wapendwa marafiki, ninyi bila shaka kwa muda mrefu mmekuwa mkijishughulisha na kazi ya kulea ndani ya vikundi vya roho hasa njema ambazo zinahitajika katika wakati huu: hisia ya umoja na ushiriki, maarifa na uelewa, moyo wa ibada ya pamoja na jitihada ya wote. Hakika, tumestaajabishwa kwa jinsi

ambavyo jitihada za kuimarisha njema hizi zilivyo zifanya jumuiya kuwa imara hasa, hata wakati zilipokabiliwa na hali ambazo kimsingi zinadhibiti shughuli zao. Ingawa imewabidi kuzoea hali mpya, waumini wametumia njia za kiubunifu kuimarisha vifundo vya urafiki, na kukuza miongoni mwao na kwa wale wanaowajua utambuzi wa kiroho na njema za utulivu, ujasiri, na kumtegemea Mungu. Mazungumzo yainuayo ambayo yametokea kama matokeo, ama kwa mbali au ana kwa ana, yamekuwa chanzo cha faraja na uvuvio kwa wengi.

Jitihada kama hizo kwa upande wenu hutoa huduma ya thamani kwa saa hii ambapo roho nyingi zinatatanishwa na kufadhaishwa, wakiwa hawana hakika nini kitakuwa. Ingawa mambo ni magumu kwa wakati huu, na ingawa baadhi ya sehemu za jamii zimesogezwa karibu na upeo wa ustahimilivu wao, jamii ya binadamu hatimaye itaivuka janga hili, na itaibuka upande wa pili ikiwa na umaizi mkubwa na uthamini wa kina wa umoja na utegemeano wake wa kiasili.

Huu siyo wakati wa kuelezea kwa utondoti wowote mafanikio ya Ulimwengu wa Kibaha'i kwa kipindi cha mwaka mmoja uliopita, au maendeleo yasiyo ya kawaida yaliyofanywa katika kuzidisha shughuli za ujenzi wa jumuiya kote ulimwenguni na kuimarisha programu za ukuaji, kazi ambayo inaendelea kwa ari kubwa popote hali inaporuhusu. Itoshe kusema kwamba, miaka minne ndani ya Mpango wa sasa, wasaidizi wasiochoka wa Hoja wameileta Imani ya Bahá'u'lláh kwenye nafasi madhubuti kabisa ambayo haijawahi kuifikia katika historia yake. Kila kitu mlchofanya na mnachofanya sasa kinaandaa jumuiya ya Kibaha'i ya ulimwengu kwa ajili ya hatua ifuatayo katika ukunjukaji wa Mpango Mtakatifu.

Kwa sasa, mawazo yetu na sala zetu vimelenga juu ya afya na ustawi wa marafiki wote wa Mungu na wale wote mnaoishi nao. Tunasali kwa bidii, pia, ili Mwenyezi ajalie uhakikisho juu yenu, ushupavu, na roho thabiti. Acha akili zenu daima zielekezwe juu ya mahitaji ya jumuiya mnazotoka, hali ya jamii mnamoishi, na ustawi wa familia nzima ya jamii ya binadamu, ambayo kwayo nyote ni kaka na dada. Na katika nyakati zenu za utulivu, wakati hakuna kitendo kingine kinachoweza kufanyika zaidi ya sala, basi tunawaalika kuongeza maombi yenu kwenye maombi yetu na kwa bidii kusali kwa ajili ya ahueni ya mateso. Tunageukia kwenye maneno haya ya 'Abdu'l-Bahá, Ambaye maisha Yake yote yalikuwa mfano wa kujitoa bila ubinafsi kwa ajili ya ustawi wa wengine:

Ewe Mjalia! Wasaidie marafiki hawa waadilifu kupata ridhaa Yako njema, na uwafanye watakia mema wa wageni na marafiki kadhalika. Uwalete kwenye ulimwengu ambao hudumu milele; uwajalie sehemu ya rehema ya mbinguni; uwasababishe wawe Wabahá'í wa kweli, waaminifu wa Mungu; uwaokoe kutoka mfanano wa nje, na uwaimarishe katika ukweli. Uwafanye ishara na dalili za Ufalme, nyota angavu juu ya vipeo vya maisha haya ya chini. Uwafanye wawe faraja na kitulizo kwa jamii ya binadamu na watumishi kwenye amani ya ulimwengu.

Imesainiwa na Nyumba ya Haki ya Ulimwengu